



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

### Epistolarvm Innocentii III. Romani Pontificis Libri Vndecim

Innozenz <III., Papst>

Parisiis, 1682

Ratisponensis Episcopo, & de sancto Emmeranno Ratisponensi &  
Prvveningensi Ratisponensis diocesis Abbatibus.

**urn:nbn:de:hbz:466:1-20020**

rius ad arbitrium confederent, quia ipsi de cetero eorum arbitrium non servarent. Ceterum tres eorum prohibitioni factæ minime deferentes, contradicente quarto, absentia Iohannis & Cononis captata, te sibi eligere præsumperant in Abbatem. Quare quod ab eis factum fuerat, videbatur penitus non valere: quia cum in manu Episcopi renuntiatum juri eligendi fuisset, & sub hac forma duntaxat electionis restituta facultas si possent unanimiter convenire, ipsi non fecerant electionem concordem, sed contra formam præscriptam convenerunt in arbitros, quorum tres contra compromissi tenorem, contradicente quarto, & arbitrandi licentia revocata, contemptis absentibus, te, qui bona cellarij, cujus administrationem prius habueras, assererebaris enormiter dissipasse, in Abbatem præsumperant nominare. Verum ad hoc fuit ex tua parte responsum quod non fuerat sufficienter ostensum vos juri eligendi renuntiasse in manu Episcopi, quod ipsis secundum canones competeat; præsertim cum nullus testium quod tu cum parte tua renuntiaveris ausus fuerit affirmare, licet aliquis dixerit se ab Episcopo sic audisse. Præterea si fuisset renuntiatum ab omnibus, Episcopus tamen facultatem restituerat eligendi si possent concorditer convenire. Ipsi quoque quatuor arbitros concorditer assumpserunt, qui etiam intelligendi sunt concorditer processisse; cum etsi quartus dixerit quod te, obstante juramento quod Abbati præmortuo de te non eligendo præstiterat, eligere non valebat, personam tamen tuam multipliciter commendavit & sibi dixerit complacere. Præterea concorditer illud intelligitur esse factum à quo non poterant obstante juramento ab omnibus unanimiter præstito resilire, cum fuisset juratum ab omnibus quod eum in quem quatuor vel tres arbitri convenirent, etiamsi quartus contradiceret, reciperent in Abbatem. Eadem quoque ratione dicebas quod arbitrandi seu eligendi facultas revocata non fuerat, nec potuerat revocari; præsertim cum etsi arbitri nondum publicassent arbitrium, jam tamen in te pariter convenissent. Nec nocet in aliquo quod quibusdam absentibus arbitri processerunt; cum Iohannes, qui abfuisse dicitur, staret præforibus, & Cono scienter se duxerit absentandum, illaque hora instaret qua electionem publice debebant, & qua elapsa, eligendi arbitrium expirasset. Super dilapidatione verò etsi nihil contra te fuerit sufficienter osten-

sum, per testes tamen tuos erat apertè probatum quod officium tuum melioratum reliqueras, & de omnibus sufficientem reddideras rationem. Nos igitur his & aliis diligentius & plenius intellectis, electionem de te factam auctoritate apostolica confirmamus & præsentis scripti patrocinio communimus. Nulli ergo &c. confirmationis &c. usque incursum. Datum Laterani v. i. Idus Martij, pontificatus nostri anno quartodecimo.

RATISPONENSI EPISCOPO,  
& de sancto Emmeranno Ratispontensi & Præveningensi Ratispontensis diocesis Abbatibus.

Lim dilectus filius Henricus electus monasterij sancti Stephani Herbipolensis in dilecti filij nostri Benedicti tituli sanctæ Susannæ Presbyteri Cardinalis, quem sibi & O. procuratori venerabilis fratris nostri Wirleburgensis Episcopi auditorem concessimus, præsentia constitutus proponere curavit quod cum in Abbatem ejusdem monasterij fuisset electus, & electionem suam prædictus nolisset Episcopus confirmare &c. in eundem ferè modum ut in alia usque examinari omnia diligenter. Itaque contra eundem electum videbatur propositum & probatum &c. usque manu fuisset, ipse monachis dicti monasterij sub hac forma &c. usque captata, eum sibi eligere præsumperant in Abbatem. Quare &c. in eundem ferè modum ut in alia usque contemptis absentibus, ipsum, qui bona cellarij, cujus administrationem prius habuerat, assererebatur enormiter dissipasse, in Abbatem præsumperant nominare. Verum ad hæc fuit ex sua parte responsum quod &c. in eundem ferè modum ut in alia usque plenius intellectis, electionem de dicto electo factam auctoritate apostolica per diffinitivam duximus sententiam confirmandam. Ideoque discretioni vestræ per apostolica scripta mandamus quatenus sententiam ipsam executioni mandantes, eundem Henricum in corporalem abbatiæ possessionem inducere procuretis, & ab universis monachis ei faciatis obedientiam exhiberi; contradicentes per censuram ecclesiasticam appellatione postposita compescentes. Quod si non omnes &c. duo vestrum ea &c. Datum ut in alia per totum.

